

Screenshots mit Windows

Wat is denn en Screenshot?

Screenshot („Billschirm-Snappschuss“) nöönt een de Afbilling vun den Inhold vun’n Computerbillschirm – avers nich etwa dör en Foto orr so; nee, se warrt in’n Computer sülvten maakt un as Bilddatei afleggt.

Wenn Se düsse Verklaarn nich verstaht, dennso maakt Se einfach mal sülvten en Screenshot, einfach so, as dat nerrn beschreven is; denn warrt dat klarer.

1. Screenshot maken

Egaal, wat Se jüst op den Billschirm hebbt – „knipst“ Se dat nu!

- Drückt Se op de Taste **Druck**. Dat is de drütte Tast rechterhand in de bövelste Tastenreeg op SeEhr Tastatuur – in de Tastenreeg, ’neem ok de Funkschoonstasten liggt.

Anschienen is nix passeert. Liekers: Dat weer’t al! De Screenshot is maakt; d.h. Windows hett sik in den Oogenblick, as Se de Tast drückt hebbt, dat markt, wat op den Billschirm wiest woor. (Kloor, dat Windows weet, wat op den Billschirm wiest warrt; dat is ja dorför verantwortlich. Mit de **Druck**-Tast seggt Se em bloots: Knips dat, mark di dat, ik will dat as Bild hebben.)

De Screenshot is also maakt – man woneem is he denn?

2. Screenshot as Bild afleggen

De Screenshot liggt opstunns in de Twüschenafraag, dat „Kortiedgedächtnis“ vun Windows. Dor hett Windows em rindaan. Wenn de Computer t.B. utschalt warrt, is de Inhold vun’t Kortiedgedächtnis perdü. Dat wüllt wi nich; de Screenshot schall dor rut, he schall sichtboor warrn. Dorto bruukt wi en Bildbearbeitungsprogramm. Un *een* Bildbearbeitungsprogramm hett jedereen, de Windows hett: Paint, dat lütte Programm, dat to Windows tohöört. Dat langt för nu ok völlig ut!

- Maakt Se dat Malprogramm Paint apen: **Paint: Start | Alle Programme | Zubehör | Paint**. – Wenn Paint bi Se nich installeert is, kiekt Se mal an’t Enn vun düsse Ünnerwiesen, dor steiht, woans Se dat herhaalt!






- Wählt Se in't Menü vun Paint **Bearbeiten | Einfügen**.
- Mach ween, dat Paint nu anqueest kümmt mit en Dialogfenster, 'neem sik dat besweert, dat dat Bild in de Twüschenafraag veel grötter is as dat lütte witte Standard-Blatt vun Paint un dat dat dor nich ruppassen much, un „schall dat Blatt grötter maakt wann“? Verlööv't Se em dat, dat Blatt grötter to maken, indem dat Se **Ja** klickt. – Wenn Paint nich queest, is ok good.
- Nu is SeEhr Screenshot to sehn – de Afbilling vun'n ganzen Billschirm, jüst as dat utsehg in den Momang,

as Se de **Druck**-Tast drückt hebbt.

- Spiekert Se den Screenshot, as Se dat vun alle mööglichen Programme her wenn't sünd, mit den Befehl **Datei | Speichern**.
- Se kaamt nu in den Dialog **Speichern unter**, 'neem Se den Naam un de Steed för de Bilddatei angeven köönt. Dat kennt Se wiss ut anner Programme.



- Bi de niegsten Verschoonen vun Paint köönt Se sik ok utsöken, welk Dateityp SeEhr Bild bi't Spiekern kriegen schall. Dorto maakt Se de Liste **Dateityp** heel nerrn in't **Speichern unter**-Dialogfenster apen un wählt dor per Klick den Typ. – Bi öllere Paint-Verschoonen wartt as Dateityp automaatsch Bitmap (.bmp) instellt. Ännern is dor nich mööglich.

3. Screenshot bearbeiten

So as Ganzes is de Screenshot nich jümmers dat, wat een hebben wull. Mehrst sünd bloots enkelte Utsneed intressant. – T.B. sünd alle Biller in düsse Ünnerwiesenen Delen vun Screenshots! Dat heet, een kann enketete Delen vun Screenshots utsnieden.

- De Toolbox vun Paint mutt to sehn ween. („Toolbox“, utspraken „Tuhlbocks“, heet Warktütchekassen.) Gaht Se in Menü **Ansicht** un kriggt Se klaar, wat bi **Toolbox** en Hoken steiht.



- Klickt Se op dat Symbol **Auswahl** in de Toolbox.



- De Muuswieser is nu en Aart Fademkrüz. Treckt Se mit dat Fademkrüz bi daldrückte Muustast en Rechteck üm den Beriek op, de för Se intressant is. Dordör markeert Se den Beriek.
(In düte Bispill hebbt wi den Office-Assistenten vun Microsoft Office, Karlchen Klammer, knipst un markeert.)




- Is de Beriek keen Rechteck? Se köönt ok dat steernförmige Warktütch direkt blangen de Rechteck-Utwahl nehmen; dat hett den Naam Freihandauswahl. Man wenn Se dormit üm

SeEhm Beriek rümmerfohrt, warrt Se sehn, dat warrt achterna doch to en Rechteck maakt. Paint kann even bloots Rechtecken.

- Den markeerten Utsnitt köönt Se nu lichtfardig verschoven:

- Wiest Se einfach op den ümrahnten Beriek.
- De Muuswieser warrt en Viefachpiel.
- Treckt Se nu mit daldrückte Muustast, un de Utsnitt wannert mit.




Nu köönt Se ünnerscheidlich Saken mit den Utsnitt doon:

- **Bearbeiten | Kopieren.**
Dorna is de Utsnitt as Kopie in de Twüschenafraag. Se köönt nu t.B. in en Word-Dokument gahn un em dor infögen (**Bearbeiten | Einfügen**).
- Orr wüllt Se den Utsnitt as separate Bilddatei spiekern? Den wählt Se glieks in Paint den Befehl **Bearbeiten | Kopieren nach...** un geekt in dat Dialogfenster, dat denn kümmt, en Spiekersteed un en Dateinaam an – jüst so as in'n Dialog **Speichern unter**.

Bearbeiten	Ansicht	Bild	Farb
Rückgängig		Strg+Z	
Wiederholen		Strg+Y	
Ausschneiden		Strg+X	
Kopieren		Strg+C	
Einfügen		Strg+V	
Auswahl löschen		Entf	
Alles markieren		Strg+A	
Kopieren nach...			
Einfügen aus...			

Mit Kopieren nach... kaamt Se in en Dialog, 'neem Se den Utsnitt as en egen Datei afleggen köönt. – Wüllt Se den ganzen Screenshot as Datei speichern, dennso wählt Se Menü Datei | Speichern.




Natüürlich köönt Se ok alle annern Funkschoonen vun Paint op den Screenshot loslaten – Klöören, Beschriftungen, niege graafsche Elemente usw. En Kurs in Paint wüllt wi hier avers nich maken; dorto giff later wat extra op www.plattpartu.de.

Keen Paint?


Is Paint bi Se nich installeert? Denn installeert Se't:

- Holt Se de Windows-Installaschoons-CD praat.
- Gaht Se na de Systemstüerung: **Start | Systemsteuerung | Software**.
- Klickt Se in den Dialog, de denn vörtüüg kümmt, op de Schaltflach **Windows-Komponenten hinzufügen/entfernen**, de linkerhand an'n Rand sitt.
- (In öllere Windows-Verschoonen geht de Weg beten anners: **Start | Einstellungen | Systemsteuerung | Software**, Registerkoort **Windows-Setup**.)
- De Assistent för Windows-Komponenten kümmt vörtüüg.
- Klickt Se op **Zubehör und Dienstprogramme**. Klickt Se dat *Woort* an – dat Woort, nich den Kassen dorvör. (Bild neegste Siet!)







- Klickt Se op de Schaltflach **Details**.



- Eventuell krigt Se nu nochmaal en Liste, 'neem Se wedder **Zubehör** (dat Woort!) markeern un denn **Details** klicken mööt.



- Se kaamt in de Liste mit de enkelten Tobehör-Elemente. De Liste hett mehrst ok en Rullbalken. Söökt Se Paint dor rut!



- Klickt Se den Hoken in den lütten Kassen vör Paint.
- **OK, OK.**
- Nu röppt Windows villicht na de CD, de Datein dorvun to kopeern. Maakt Se man allens so, as Windows Se dat nu anweist. Wenn Windows de CD nich brukt, man liekers Paint installeert, denn weer dat al bi de Installaschoon vun Windows op de Fastplatt aflegt west, man bloots noch nich aktiveert. In de mehrsten Fälle will Windows avers de CD hebben.

Trecht. Nu schull Paint bi Se to krieggen ween!